

南陵縣志卷三十一

人物志

孝義

晉何琦字萬倫司空充之從兄也祖父龕後將軍父阜淮南內史琦年十四喪父哀毀過禮性沈敏有識度好古博學居於宣城陽穀縣事母孜孜朝夕色養常患甘鮮不贍乃爲郡主簿察孝廉除郎中以選補宣城涇縣令司徒王導引爲參軍不就及丁母憂泣血杖而後起停柩在殯爲鄰火所逼烟燄已交家乏僮使計無從出乃匍匐撫棺號哭俄而風止火息堂屋

南陵縣志

卷三十一

人物

一

一間免燒其精神所感如此服闋乃慨然歎曰所以出身仕者非謂有尺寸之能以效智力實利微祿私展供養一旦煢然無復恃怙豈可復以朽鈍之質塵黷清朝哉於是養志衡門不交人事耽玩典籍以琴書自娛不營產業節儉寡欲豐約與鄉鄰共之鄉里遭亂姊沒人家琦惟有一婢便爲購贖然不爲小謙凡有贈遺亦不苟讓但於己有餘輒復隨而散之任心而行率意而動不事占卜司空陸玩太尉桓溫並辟命皆不就詔徵博士又不起簡文帝時爲撫軍欽其名行召爲參軍固辭以疾公車再徵通直散騎侍

郎不行由是君子仰德莫能屈也桓温嘗登琦縣北山喟然歎曰此山南有仁人何公眞知足者也琦善養性老而不衰布褐蔬食恒以述作爲事著三國評論凡所撰錄百許篇皆行於世年八十二卒

晉書孝友傳

按嘉慶府志云後人爲立祠工山又祀郡孝子祠

唐蘇仲芳太和中父死負土成墳廬於側繞墳行哭羣鳥隨之悲鳴祥雲覆墓瑞草蔓生鄉人勸其歸不聽乃棲寄安賢寺著戒行數年跌坐而化室有異香宋李經字天常紹聖元符間人性篤孝母死廬墓工山躬執畚鍤參垣植松地故多虎經不畏避虎遂絕跡

南陵縣志

卷三十一 人物

一一

一日有人携桃過者共食幾盡視其人甚頎雙髻碧眼旣去後屬樵者以詩寄云一抹青烟低碧草門前列岫如藍掃種杏仙人去不還曾參空伴閒雲老卒不知其姓名嘗夜歸風雨急暗若有以火導行者道旁茅舍翁媪延入語甚款且曰聞李孝子名今乃識之旦視之士神祠也每見後生必訓以孝經曲禮大旨年八十卒紹興中知縣葛祺立蘇李二孝子祠又並祀郡孝子祠

舊府志云蘇李事舊略懼涉怪也從孝順事實例存之今仍載按嘉慶

府志引萬曆志與此同此云舊府志卽萬曆志

明張昭字斯明年十四父邁危疾割臂和糜以進病獲

愈及卒哀毀骨立葬送以禮父有遺寃誓死圖雪有捐建文廟造橋賑饑諸義舉進士童寬爲撰孝義傳恩授承事郎建坊旌表雍正八年詳請祀忠孝祠又祀郡孝子祠

吳珍性友愛弟疾篤告天求代不數日弟愈珍邁疾歿弟撫其七子勝已出稱一門友愛

沈仲擘弱冠時母歿守棺不入私室比葬廬墓側朝夕哭泣父憐而召之不歸以疾卒祀郡孝子祠遺孤甫週歲妻詹氏守節撫以成立詹七十餘卒並稱節孝

劉邦正年十六父哲病篤割股和藥以進父夏月思蟹邦正號泣河澣得二蟹疾尋愈每朔望禱天願減已算益父俄仆殞嘉靖四十四年事聞御史宋纁撰文遣官祭墓所扁書純孝祀郡孝子祠

何炳邑庠生盜刦其家執父案欲殺之炳挺身出救父得脫炳遇害事聞督學御史周旌以孝烈祀郡孝子祠

丁楨侍郎鎡之姪孫兄子涿論死繫獄楨恐兄絕嗣請於官願代涿死獄成知縣胡文靜察其枉白於當道破械釋之胡口占有云判比南山未敢誇漢時好

事屬于家請看東海三年旱也只當年一念差乾隆九年旌

曹鐸年十六補邑庠生父歿廬墓有碧雞黑虎之祥四明陳君猷題其門曰德徵釣於虬川年九十而歿乾隆九年旌祀郡孝子祠

何正人晉孝子琦後七歲時母病浮腫以手按之泣不已母喪臥於尸側諸母慟勸乃起父病焚香籲代及卒廬墓三年事聞賜帛給冠帶旌之卒年九十附祀孝感祠又祀郡孝子祠

嚴大本刲股療母疾及父母相繼喪廬墓三年縣令

扁曰純孝可風里人建祠祀之又祀郡孝子祠

秦本七名才字士英明初以鄰羅氏累闔門徙屯鳳陽期滿例編最長一人從軍本七有兄當行本七不忍毅然棄七歲兒於外家携婦赴陝西莊浪衛時國法嚴峻道中屢瀕於死清順治間九世孫憲副仁管學使才管先後宦陝訪拜其墓仁管有莊浪志感詩見藝文其七歲兒名道三稍長尋親備嘗辛苦懸象奉事縵經終身亦克敦孝義焉

秦邦欽號養虛性至孝家貧無由得甘旨訓授生徒塾中每自減餐分以餽母博文強記經史百家皆手

錄成帙以偃蹇文場憤鬱早卒

汪元祖

徐志原注云舊志誤元祖按府志作元祖亦誤

號洪川事親至孝親

喪廬墓三年郡太守旌以純孝濟美四字其居鄉忠信耿介無諂無驕人至今稱之

夏守琅父早逝母崔教以詩書不願仕進力耕養母無故不去左右母臥病守琅憂皇求救形瘠骨立母怒曰汝若是欲速我死耶乃強爲歡笑以寬母心夜則籲天求代及母卒哭殞苦次久之始甦母葬蕪邑彭村築廬墓側三年蕪文學崔彪爲立傳

黃思齊行二父濬遭仇誣陷流離顛沛思齊時甫弱

齡跬步追隨年至十三誓不與仇俱生齧指瀝血書詞控父冤巡撫耿公樸異之面鞫所以惻然動容竟得平反父歿廬墓三年哀感行路人以米薪餽不受族人重其孝行迎歸里居仇家亦爲感化

曹七善邑諸生事父孝嘗於姑蘇旅邸獲徽商所遺八百金留五日候其人還之歲饑輸粟五百石佐賑邑令錢贈以詩乾隆九年以孝旌

清秦鳳儀字斯來號帶澹九歲喪父伯兄繼亡弟方襁褓母宦性嚴峻督課不稍假鳳儀讀父書痛自刻勵以悅母心爲文清堅奧博時司李黃公尊素攝郡篆

奇其文拔冠童子軍領天啟辛酉鄉薦公車屢躋教授生徒館穀悉以供母自與妻子半菽不飽忻如也順治丁亥子仁管才管同舉進士官部郎祿養所入輒以濟親族待舉火者數十家著述甚富嘗與修邑志年六十四卒疾革自言曰吾一老孝廉當明季可以用世而不爲世用固處士也恭遇興朝膺綸封而株守邱園又逸民也言訖而逝及門諸弟子核其素履稱曰仁孝先生祀鄉賢祠

陳大任父性嚴峻先意承志得其歡心母何疾久不痊割股救之逾年母卒事繼母俞進則承歡視膳以

爲常退則追痛生母吞聲飲泣久之致疾垂絕有道士投丸口中拊其胸呼曰爾忘爾父耶遂甦嗣後孝謹愈至隨在婉容幾諫倍極苦心至凡周卹族黨好行其德而不自居曰吾父意也人益賢之

府志通志  
列明代

黃鼎庠生黃福子生五月父歿未嘗深讀書天性仁孝母楊苦節中年病癱瘓寢蓐展轉皆憑人力鼎事事躬親十年如一日母長齋並絕鹽醬跪勸頤養宜肉食不許亦自茹素終身母性素嚴病久卞急益甚鼎嘗於榻前受杖無愠色母卒哀毀終喪未見笑容得素果食必泣獻於墓

施炆兄弟七人炆次最幼十歲時父所蘊被寇害甚慘炆抱尸哭踊仆地絕復甦者再寇爲感動釋之而去事母尤以孝聞析爨田產惟伯兄命三兄早世撫其孤女擇配嫁之資送一如己女乾隆九年旌

劉宏業幼年喪父事母篤孝與兄宏基友愛特甚順治中兄弟俱試一等奉文於一等內舉三人充選貢宏業名第二宏基不與業固讓兄學使嘉其義允之業至癸亥始貢授訓導舉鄉飲大賓

劉士珙

徐志注云舊府志誤珙按嘉慶府志已改正

年十八父亡母患夙

疾琪侍湯藥惟謹年餘不入私室母歿不御酒肉者

三年

方正範字憲甫父初元績學未售正範承父志勤誦習著有太極圖解西銘通旨諸書母章病刲股進潛禱於神願以身代夜夢神語曰帝許活而母矣尋且召汝未幾正範卒年三十有七子二長倬次伸倬六歲而孤卽哀毀如成人又能宛轉色笑以慰母李李善病倬侍病數十年如一日割股作糜不自知痛母疾以痊篤愛弟伸不忍刻離伸就試倬每負囊與偕雖勞瘁弗惜也伸子于璟亦能事親伸宦汀州邁危疾醫莫如何璟糜股和藥食之頓愈福州守顧焯爲

作誠孝說

姚舜日兄弟五人舜日其長也父因食指日繁舊逋日積幽憂致疾一日舜日跽請曰父所憂者兒知之兒願產爲均分債獨兒任父母膳養兒供之幼弟孱弱兒撫之無煩父憂父躍然起曰能如是乎吾復何憂因召諸子詔之父病隨愈後舜日雖當諸務糾紛支撐無術之際亦欣然無幾微愠色及父母卒喪葬費悉出一已不問諸弟郡守周公日宣扁以旌孝維風年七十餘卒時諄諄訓子姪以孝義云

夏日瑚邑庠生事親至孝親歿結廬墓側順治丁酉

洪水爲災日瑚煮糜舟載沿堤餉之嘗應闈試同寓諸少年惡其方正一日與之步月輒登妓樓日瑚初不知也少年先予妓金令扃戶百計誘之終不可少年始服其操

王際康字五清事父通篤孝痛母早死終身侍父寢食跬步不忍離中衣廁牕必親浣之未嘗委僕婢有疾衣不解帶顙天求代中康熙乙丑第四名進士時欽定進呈前十卷皆自陳奏得館選際康獨默不言趨歸養吏部以中書取用堅不赴與兄貴奉父山中父目以爲左右手又八年父歿居喪委頓服闋選雲



南祿豐令道病卒先是邑人困於里役賴力持行條編之例既歿而人猶感頌弗諠云祀郡孝子祠

朱飛霞素行醇謹尤以孝聞父病篤衣不解帶者四十餘日割左臂以進父始痊母張病篤又割右臂進亦立痊後居喪一遵禮制骨立莫支邑令杜旌以篤孝維風太史方位齋有贊見藝文

程萬昇孝事瞽母病亟羹股和藥病愈而目亦明及歿廬墓三年父歿亦如之嘗有虎臥廬外蛇繞榻前習不爲異邑舉孝廉臺司屢檄旌獎

劉應熙字廣起光祿楷長子性篤孝負才通敏諳大

義初楷將之官念孀母趙年高嬰夙疾欲留養不得欲迎養京邸又苦不耐舟車展轉莫可如何熙時甫弱冠請曰大人行矣晨夕大母左右兒責也侍起居潔滌灑孝養倍至閱十餘年楷致政歸奉母以居熙乃以廩貢教諭東流舉卓異陞山西壽陽知縣部限癸未三月抵任而父楷於二月下浣壽六十或謂早之任可恭遇萬壽覃恩熙曰固知之然不以易此一日歡也已而果以遲限未得封且停俸熙欣然不爲意弟運洽邁病親延醫視藥數月不倦在東流聞弟應湛病亟買舟歸視風逆不得進舍舟步行風雨泥

瀟不顧也秉鐸時嚴立程課以主持風教爲已任護  
邑篆贖數百金充楚餉令壽陽釐剔諸夙弊殆盡而  
豁免虛丁三千有奇井陘有執鞭者以罪論抵察其  
誣辨出之癸未冬駕西巡經壽陽召對稱旨丁亥復  
舉卓異留任候陞知州俄疾卒人咸悼惜焉

戴廷瑤年十五母王病割股以進逾年父永備患蠱  
疾又割股父尋愈越五年復病醫藥罔效又屢割凡  
五次肉盡骨見人皆憐之

陶德澄幼喪父與母馮相依稍長左右奉養無方母  
病篤刲股顛神百救不起居喪三年晨夕哀聲徹遠

邇聞者悲之

孫仲遠邑增生母歿委頓苦次幾致滅性父喪廬墓  
三年伯兄爲仇家誣陷羅重獄仲遠挺身營救偏訴  
諸臺使誣乃白家非素封遇族戚貧者悉力周之崇  
正末飢人枕藉道路倒困以賑舉家粥食不顧也順  
治庚子學使王公同春優舉孝廉乾隆六年旌表祀  
忠孝祠子光祝光祀光祚悉遵庭訓敦行讀書光祝  
嘗割已田爲諸猶子膏火費諸猶子感奮力學或領  
鄉薦或食廩餼孝友肅雍人推萬石家風云  
查贊臣割股救祖父病祖歿廬墓三年邑令旌之

程之鑑年十六割股救祖母病病立愈又三年始卒鄉人咸以爲孫孝所感也

汪璨

徐志注云璨府志作璨按省志亦作燦

邑庠生四歲時喪父繞棺

悲號不止見者稱異年十七割股療母病季弟早世以遺孤屬璨厚撫之家甚貧甯自枵腹不使姪飢也族有遺以金者卻之曰余雖貧何敢妄取後家業稍起則又以濟困扶災爲急平生言行卓然不苟邑令杜旌曰步趨前賢馮希俶父益鵠病三月幾不起俶以股肉救之愈後十有七年乃卒父病時中衣寢蓐悉親浣濯不假他

人平生排解紛難尤好行陰德云

葉正萃生三月而父應芳卒母周年二十三誓死守志後以哀傷勞瘁致手足痿痺正萃左右扶持不離跬步間以事他出雖深夜必歸歸必款款侍問榻前以爲常及歿擗踊哀號如醉如癡旣葬仍寢處墓所時或大哭以歸不移時又哭以往路人與之語皆弗省尋卒

秦柄芳母病藥餌無資私進以股肉不愈及卒喪葬苟簡柄芳自傷貧窶不能如禮時時號泣田間晝出傭工夜宿墓下三年父卒復然不數月竟以哀毀終

朱國賓父卒廬墓三年母卒葬繁邑龜山復結廬墓所居三年始歸邑令表其門

張文侯農人也母病家貧無以市藥乃私割股和葱薑以進服之而愈

俞一鷗邑庠生父母相繼歿前後居廬泣血茹蔬一遵禮制事庶母尤謹學使以追蹤曾閔四字旌之  
張雲鱗邑庠生十歲喪母哀毀甚於成人事祖母及繼母一如其母念父攻苦未售一意向學以慰父心  
尋入泮有延之遠館者曰吾不忍刻離吾親卒辭之  
安貧養志于于如也父歿居喪一秉古禮衰經三年

自初虞以至除服每祭奠必有文酸音楚節人不忍讀待異乳弟不啻同懷尤人所難云

吳尙灝忠臣景後父母俱亡既葬廬墓三年不歸知縣楊必達訓導湯原清嘗詣廬次訪之旌其閭曰忠孝名門

吳一開年十五父病謹視湯藥不解衣寢者兩月病劇療之以股霍然起後越十二年乃卒

何士闓篤於孝義康熙初族何滿盜破其祖母塚士闓訟之官三年不得直撫憲檄南繁兩邑令會勘滿健訟仍未得直士闓遂號天大慟觸死碑下兩邑令

感其至性立勒滿起盜葬之棺復題墓曰義士何士  
閼墓

張裕明經忠義仲子生有夙慧四歲就傳誦讀朗朗  
如成人祖良浩病且殆忠義皇迫顓天求代時裕始  
八歲聞之泣曰父不可死兒願以身代祖也隨向天  
誦誦似密有所禱者未幾果病家人強以藥吐弗嚙  
曰祖病未痊吾何藥爲且吾業已告天矣病七日垂  
死囑人曰勿令吾祖知遂卒知縣康五瑞表其閭學  
使韓城張公書孺孝型俗旌之

陶達郡庠生十五歲時母陳病篤與兄成忠百計醫

治不效乃各割股和藥以進病果痊其兄弟終身友  
愛無間族黨尤稱之

陶性字躬仁邑廩生孝友性成砥行飭躬一以古人  
爲法父病晨夕顓神願減己算以益親年父病旋愈  
居喪哀毀杖不能起茹素三年絕跡內室叔輝祖年  
最幼事之如成人不敢稍忽友愛兄弟析產時田廬  
器物推美讓腴歲戊子大饑鬻田糴穀以周族黨鄰  
有鬻妻者出館金留之工詩善書恥事干謁鍵戶一  
編吟哦自適辛丑與修邑志尋以疾卒

汪炳字瑤仙邑武舉襁褓失怙事孀母王曲得歡心

母病劇刲股煮粥進之立愈會仇家以農民充役報其幼弟炳往自充母歿弟求析箸田廬惟弟便者聽已而弟亡姪貧甚仍分已田與之康熙戊子歲大侵賑穀數百石不足糴於外以繼焉

徐强家甚貧親歿廬於墓側雍正十三年以孝旌

汪元霄字節生性孝友好施濟乾隆二年以孝旌

按嘉慶府志據乾隆府志孝行有汪元霄傳認行有汪節生傳而徐志認行則汪節生無傳今觀汪元霄字節生當係一人而府志誤作兩人府志云樂善好施嘗建亭子橋山嘴橋以濟行者又於青南接壤處建錢家橋皆獨力捐金成之雖繼以稱貸弗顧也斯即徐志所謂好施濟之實事及考宋志認行汪節生傳府志悉與之同乃知乾隆府志采錄宋志原文而嘉慶府志復行沿襲其舊徐志因乾隆二年元霄以

南陵縣志

卷三十一

人物

十四

孝旌有案故不收認行而收孝義致認行畧而弗道光緒省志亦然茲特附注於此

何繼淳字儒初庠生居家孝友歲大侵出廩穀以活

飢者鄉人俞二曹滿坐冤獄妻子將離析繼淳出貲

力白之全其家乾隆四年以孝旌

朱懋陞省志作升年十三母病輒號泣不食後父病隆冬

思食鮮魚懋陞不避風雪百方求之數日果遇一人

持雙鯽至喜而歸予之值其人忽不見眾異之及歿

寢苦不離墓側族人憐之為結茅以居服闋强之始

歸繼母性嚴晚得瘋疾懋陞與婦奉事惟謹嚴寒酷

暑每夜數起如是者二十餘年巡撫趙給額旌之

葉大雯附貢生母早喪號泣滅性父疾數月晝夜侍湯藥弗怠及卒哀毀如母喪有庶弟二俱幼大雯篤愛之鞠之不啻同乳弟聖功早世撫其睟遺孤逾於已子嘗捐修明倫堂費至三千餘金藩司擬咨部優叙大雯力辭曰此吾父志也敢以已沽名哉制府尹以義敦孝德四字旌之父又嘗助家廟基建饗堂大雯不忘先志復加繕葺以底於成兩遇歲饑捐賑減糶皆千餘石他若築堰建橋甃路諸義舉不惜傾橐爲之臨歿猶檢券自焚戒其子曰我先人世傳忠厚若等宜恪守之乾隆 年以孝旌

王元超監生天性純篤父母並登大耋曲意承歡有老萊風父歿晝夜依侍母所不入私寢先母卒囑家人曰善事吾母無他語兄弟並業儒元超佐父治家及析產讓豐受約嘗遇歲臘有過客失貲啼於路卽出已貲賙之父喜甚族人瀛彥任海鹽令虧帑爲助補五百金又族有枯骸裨毀買地易槥以瘞秦炳邑庠生七歲失恃一慟昏絕柩厝宅畔每就塾歸必往哭父年七十患膈症不能食炳亦不忍食及歿廬墓父在時命析箸已而兄卒遺子女各二俱幼復合爨撫育成立篤念從子單寒爲之授田完室葬

無後者五喪戊子大禋鬻貸以給賑總理祠事一族服其公正

章有才字猷吉八世同居三歲時人與以果餌必與羣兒均之父歿悲慟絕復甦者三其家衆雖各年老皆如孺慕之初弟患疾一夜十往湯藥必親子姪繁衍各視其質之所近授以四民之業家貧服食常患不周少者每讓其長者內外九十餘口略無閒言家畜騾牛同欄不相蹄齧人以爲義所感邑令段旌之楊思通家貧力耕以養親父染癘侍奉數十晝夜值暑月蚊嘍體成瘡不自知後患痰症臥蓐六載躬濯

垢污卒不起厝柩舍旁晨夕依戀號泣母老而病承奉益至歿後與父合殯號泣亦如之事二兄友愛有事悉以身任弟抱羸弱病已析復合變產以供藥餌無吝容身後無嗣弟婦苦志推次子桃之嘗捐已地建家祠尤克承父志云邑令宋廷佐以額旌施斌炆三子生有至性父疾奉湯藥寢食俱廢父歿事母加謹逮喪寢苦枕塊不入私室結廬守墓三載凡建祠修橋悉遵父志乾隆三十六年旌王鬱林字龍標邑庠生候選衛千總七歲喪父慟哭幾絕及壯嫡母劉病疽口吮膿血生母何患痰疾喘



吁危急籲天求代及歿哀毀盡禮乾隆三十七年旌  
朱玉成家貧百計謀生以供親膳母歿泣血苦次父  
歿廬墓三年後以勤儉稍積貲嘗歎曰昔不足而今  
有餘無補也乾隆己卯歲荒出金數百兩給散貧乏  
邑令額獎之壽至九十八歲乾隆三十七年旌

秦永芳字恆士循子職敦人倫承歡不懈終亦盡禮  
乾隆三十七年旌

張燦明採樵供親甘旨必備父母歿躬負土營葬墓  
旁忽蛟發迅赴洪濤卒保無恙乾隆四十二年旌  
何孝定家故貧傭耕以養父母父歿慟哭欲絕以母

在節哀自是跬步不忍離甯薄值傭近地便定省焉  
主人食稍美必袖以遺母主人憐其孝輒多予之及  
母病百計醫禱卒不起日夜號泣水漿不入口既葬  
廬墓三年族人挽之歸猶日詣墓所瞻戀不去年踰  
八十如孺慕云

張永達字孚公邑諸生早喪母哀痛如成人父朝旭  
鰥居且病足扶掖者數十年父歿合葬廬墓學博張  
曾亶爲之傳司訓汪慶禋贊之

柯學韜性誠孝生母王臥病兩載親嘗湯藥不假他  
手母歿哀毀盡禮事繼母汪一如生母能得其歡心

及父歿廬墓三載時有碧雞黃鹿馴擾墓前人以為誠孝所感邑令馬國雄以仁孝可風學師陸成岑以孝思不匱扁獎之

徐可椿字靈九監生徐允鎬三子生有至性父思鱸魚即赴松買供母胡氏喪明椿朝夕話目三年復明及歿合葬峩嶺其山多虎椿廬墓六載猛獸俱馴人以為孝感所致

劉鏞庠生九歲誦孝經焚香顛神祈延親算至壯弗懈里人異之母患疔已危鏞寫表泣訴願以身代母體頓安僉稱神佑平生步武不敢先兄學使徐獎以

扁曰克敦孝友

以上舊志

明何執中洪武初襲父爵民兵萬戶與弟時中聚族同

居九世不分

見郭凝之皇明孝友傳

吳果嘉靖年間孀母汪氏卒葬七女山方冲果廬於墓側每日號慟不止淚著樹樹為之枯如是者三年府縣旌以扁額

清何三特字君平當鼎革時父適病危三特齒嚙臂肉和藥以進後其子繼洙事母亦復如其父孝子之後復生孝子論者兩賢之

劉昌德字仙岩性醇厚父母疾籲天以代臨母喪痛哭暈地屏絕葷酒尤敦手足之誼年七十有七卒汪大仕字學之好讀書不求仕進性至孝母喪廬墓三年朝夕哭奠又以母遺命助田五十畝爲宗祠冥饗之資至今族人稱之

盛大富字偉生母娠而父歿及生大富幼聰慧母劉氏以家赤貧恃針黹佐讀迨旣成立適劉病篤富割股肉以進後復病亦如之年三十有三卒族叔盛於斯曾作哀詞以誌痛悼焉

俞鎮字守之早年失怙弟方幼飲食寢處必與之共

後弟長授室已生子矣忽遘疾鎮輒誓神願減已算以益弟及卒視姪如己出且撫之成立鄉黨益賢之劉世謹字行先家極貧父櫟園歿於陝西謹隻身徒步數千里負骸骨以歸性尤清介不慕榮利終日惟閉戶讀書而已同邑劉芸菴有詩曰麻屨踏破帶星奔溫序招回萬里魂舊業好收榆閣在父書一帙守清門蓋紀實也

繆廷榮親病憂惶無措一日問人曰割股療疾信有之乎人亦漫應之卒莫解其何故久乃知其割股救親而故先問之以益堅其信也其愛親之誠有如此

繆文執有義俠年十六爲爭執祖墳獲罪琅璫囚繫  
痛哭赴潼關應軍不累族人後遇恩赦回已鬢髮白  
髮矣  
繆昇如性友于兄弟相處怡怡如也厥後以家庭之  
變不得已而析居田廬獨取其荒頓者器物獨取其  
朽敗者蓋猶有漢薛包之遺風焉  
張善偃字少游性仁厚居父喪水漿不入口朝夕哭  
之慟三年不離苫次後營葬獲吉地論者咸謂孝思  
所致云

俞一賡字淑和號象夔視兄猶父視姪猶子嘗語人

曰兄曰家督姪曰猶子於此而不用吾情惡乎用吾  
情邑侯張以孝友真儒旌之

劉運樽號千峯樽故儒者念先代多浮屠潛心郭璞  
葬經卜得吉壤遷其遠近祖及兄弟柩俱安窆窆涇  
邑趙青藜侍御嘗題其象而嘉之

汪大璋字奇峯康熙時授荊州判官不數年陞廣東  
合浦縣知縣又調豐城令卒以母老不赴退居田里  
先是家極貧父早喪母以女紅佐讀及筮仕母曰爾  
爲官稍得祿精足矣爾無兄弟吾無夫勿使年老人  
有倚閭之望至是歸杜門不出依依膝下壽七十一

終

盛士愨字心純生平孝謹父疾呻吟牀蓐愨親調湯藥潛雜股肉以奉血漬衣袖家人始知之其真摯如此

繆之彥母年九十有五患瘋痺動止不良彥奉事益虔數年間未嘗得一安枕縣令嘉其孝給以敦倫可風扁額

劉淦字韻超號麗泉父珍生淦繼珍仲兄爲嗣及珍卒祖母莊氏母何氏兩代居孀淦曲盡孝養喪葬如禮旋以何氏節孝上聞奉旨旌表鄉黨榮之

陶珏信字雙玉天性肫篤嘗與人言曰祖母苦節未旌吾父飲恨而歿今日乃吾之責也後乾隆十三年適遇國恩爲祖母請旌建坊卒繼父志

王賜炆號榆村乾隆壬子舉人江西樂平縣知縣少孤事母至孝色養備至母病憂泣至損寢食事繼母尤謹與庶弟析產不較量貲財或有爲子孫慮者賜炆曰遺子孫者莫如積德區區田產抑末也聞者咸以爲名言時邑有卒於官者無殯斂費賜炆賻之不告姓名又生平篤學好古著有四書便解嘉慶間纂修邑志並覆校府志甚爲當道所重

王善璽生於乾隆甲辰年週歲喪母孀母宋氏撫之  
璽奉孀如母家貧無由得甘旨傭工鄰里每自減餐  
以遺之後病卒廬墓三年邑侯王成璐詳請給以純  
孝扁額

劉持字公衡篤友愛早歲與兄同居兄鬻產就官漠  
不與較析炊後兄以罽誤褫職家產蕩然仍分已田  
宅與之

王可象字百玉幼失恃伯母撫之後伯母病危命懸  
呼吸間計無所出乃潛執利刃割股肉一臠以進血  
漬襟袖盡溼若不知有痛楚者族祖副舉人夢桂曾

作詞贊之

陶大孝字慕懷家極貧母病無以市藥大孝憂甚忽  
忽若有失者數日未幾母病瘳詢之乃知其割股煎  
湯以療之也聞者咸爲之愕然

陶讜忠字諤士性真摯孀母汪氏苦節未旌居常引  
以爲咎與弟謹忠已異居矣後忽痛自懲艾頓足椎  
胸曰有弟而不能終身相聚骨肉參商同氣之謂何  
也言訖悲不自勝乃復謀合爨焉以故人稱其孝友  
梅言燦有至性父老病篤醫云症將不治燦泣乃闔  
戶封左臂肉煮葎汁和之三和三進病尋愈

李占先性孝友親疾割股以療之兄弟終身同居未嘗有異言且每食必偕嘗曰世間最難得者兄弟讀棠棣之詩而不怵然心動者非人也其敦睦如此張應球事親極孝親病憂懣不食終日淚承睫或有謂股肉可以療病球聞之遂持刀割其股血淋漓和藥以進疾雖未愈然人無不矜憫之者

丁枝衡字玉生九齡喪母事繼母如生母母病垂危衡療以股肉或曰身體髮膚毀傷者非孝則應之曰吾惟知愈母之疾而已孝不孝固非所知也儒學顧璜贈以孝思維則扁額

劉兆鯉性孝友伯祖父母歿家貧子幼鯉獨力營葬撫兩孤如己出析爨時分家貲爲三兩孤二子一無纖毫私人多義之

俞思仁字志忠號道三孝事父母視膳問安未嘗一日間父卒哀毀逾恆母老病癱瘓飲食櫛沐動輒需人思仁侍側有呼立應自朝至暮盡丙夜無幾微倦容母安焉病亦漸愈

劉邦錫父病刲股和藥以進得愈冬月積雪父思食鮮魚邦錫往求見池冰有穴探之果得鯽四尾以獻曹雲翰諸生親卒廬墓三年楊志趕親卒廬墓三年

卒於廬所

謝永棣昆季分爨推腴取瘠父病禱以身代母攫末疾扶持三年不解衣帶偶外出室遭回祿突入負母出而母竟以驚卒永棣哀毀火瘡迸裂亦卒

秦穎庠生少失怙恃其叔撫而教之穎事叔如事父叔病侍藥衣不解帶及卒廬墓哀奠期年遂卒於墓所

張大勳貢生父母歿哭奠三年兄早世撫姪如子厯任鳳陽府及石埭潛山廬江諸學訓迪士子必先道德而後文藝學者稱仁孝先生

孫瑞年十一喪母朝夕往哭於厝所父病不食瑞亦不食侍奉湯藥衣不解帶兄卒諸姪俱幼教育授室俱得成立

阮相父卒廬墓三載朝夕哀思竟以毀卒

范達聘母年八旬患痿痺時聘亦五十餘歲侍藥浣濯臥寢側數載及歿廬墓三年

沈鍾林字從心親病憂泣不食嘗誓神願以身代後母歿廬墓三年卒學憲獎以廬墓從親扁額

沈岸如事親至孝母歿負土成墳廬墓三年旦夕哭泣不止有勸之者曰母死我何忍獨生後上憲獎以



彝倫克敦扁額

劉宏霧劉大麒俱刲股療母大麒時方十歲

管南貢生家貧授徒奉母必備甘旨及疾刲股和藥以進尋愈後居喪哀毀茹素三年兄弟族黨有空乏者嘗出館穀周卹之

劉諸馮諸生母老有殘疾起居需人諸馮侍臥側者十九年家本貧勉助族人婚娶殯葬凡二十餘事陳世蓮年十四母病篤割股雜糜以進母母聞而憐之蓮曰母倘得生死何足惜言已而哭母亦哭未幾疾瘳

沈從義字竹溪親疾刲股和薑湯以進未幾果愈人問之則曰此傳聞之誤耳其不自暴其名如此

葉少卿字子初年十九父病瀕危醫者咸束手少卿憂甚一日齋沐中夜起作疏告神取刀割股肉雜米汁以進病尋愈

葉承寵字懷玉性篤孝父早喪母陳氏有痼疾延醫診之罔效承寵甚憂之忽悟曰吾聞古人有刲股以愈疾者吾何獨不然遂焚香告天刲股以啖其母疾遂愈先是陳病三十年目已瞽至是目復明人以爲純孝所感云

章鎮元字新椿髫年失怙事孀母極孝母病鎮元憂甚曰吾母飲冰茹蘖數十年但多活一日即多得一日之養於願足矣否則母死吾何生爲一日煎湯進母雜以股肉母不之知也未幾病霍然

秦希蕃字慕川前母生有二子蕃事之盡禮一衣一食及凡物之美者必先奉之不以自私持身儉約事父母必謀甘旨以進終其身依依孺慕父號在川故自名慕川

秦先安字懋康邑庠生好學不倦體最弱平居嘗私憂竊歎曰父亡祇一母在不幸年又高倘先填溝壑

此身不足惜其如吾母何言已而悲悲而泣淚潛潛如雨下後母卒喪葬盡禮衣麻衣終其身

汪產如父喪哀毀骨立廬墓三年母歿亦如之上憲旌以扁額題曰孝以學純

劉家和字宏祥幼喪母哀慟幾絕父病侍寢處終宵惕息久而不懈後勢日劇割股以進創旋愈年八十餘卒

汪明洪字朝宗厚重簡默篤孝友兄以無辜獲罪洪請代號泣公庭勺水不入口者累日邑令惻然許之遂流雲南後卒遇赦歸

朱文琢字華廷生有至性年數齡卽知定省母疾衣不解帶於夜深人靜不令諸兄知焚香禱告祈以身代俄病愈人咸謂誠可格天云

朱之瑞字上珍天性肫篤痛父早喪每值春秋祭奠輒流涕曰祭而豐何如養之薄也事孀母極孝甘旨奉養外事無巨細必稟命而後行縣令嘉之獎以孝思不匱扁額

潘選章字蔭岩性醇厚有姪紹基甫週失怙家極貧課讀完婚視如己出紹基卒賴以成名

劉其昌字銘三太高祖楷曾伯祖宏振置有義田以

瞻族中匱乏其昌悉心經理遵守弗易值咸豐粵匪肇亂義田冊俱遭灰燼其昌於鋒鏑之餘將各莊義田盡行踏勘一一簿錄後義田得此左驗賴以無失  
葉克宗字廷富鴻綸之子廷芳之弟也父年高事之益謹嘗曰吾兄宦遊於外家庭甘旨之奉吾當獨任之倘定省有虧不惟不孝抑亦不弟矣後父病割股和羹湯以進之咸豐時遇難卒  
林維良事瞽母極孝咸豐癸丑粵匪肆擾夫婦負之以逃後被擄夫婦哭泣呼號願殺身以全母賊義而釋之

劉作鈇字于仁咸豐甲寅冬粵匪竄入邑境鈇負母  
逃避不及急命弟扶母去乃拾石向賊擲之且擲且  
罵賊怒刺以刃血流被面身無完膚卒投淵自盡儒  
學胡公憫之贈以純孝捐生扁額

王光流字德川號正卿國學生性素孝友其兄光如  
咸豐五年赴郡試獲罪應死光流得悉涕淚交集卽  
赴郡城驚聞罪在不赦一慟而絕未幾復甦終以無  
術挽救竟於是夜吞金卒郡守聞之感其義遂釋兄  
罪

徐文選字華棠秉性至孝事親先意承志父久病奉

湯藥晝夜不懈病急取父糞嘗之泣慮不起禱於天  
請以身代及卒哀毀骨立廬於墓側食必祭哭必盡  
哀事兄愛敬彌篤至老弗衰咸豐十年粵寇犯縣城  
以布衣從軍積功荐至運同銜河南儘先補用知縣  
賞戴花翎性恬淡不求仕進曰吾志希古人未能也  
惟無污於世差堪自信耳光緒十二年以疾終年五  
十有四葬灣村

潘友和字慶桂咸豐己未賊陷南陵被擄母痛之乃  
奉佛戒葷以祈子還未幾歸和感母意終身茹素後  
母卒和哭之慟幾以身殉廬墓三年

汪炳忠從九咸豐十年格裏村被賊蹂躪財物一空  
忠被擒思有母在乘夜逃去尋復被獲乃黥其面又  
設計遁出賊中竟與母聚孝養終其身  
鍾開來咸豐十一年賊執其母欲殺之開來挺身救  
之不及大哭尋亦遇害准祀忠義祠  
陳延寵咸豐八年粵賊倡亂父煦被擄寵痛哭長號  
淚與血併舉刀欲自刎者再賊感其孝釋之  
胡朝佐咸豐時遇賊欲殺其母佐求救不獲遂肆口  
嫚罵賊怒以刃加其頸曰爾知懼否曰不過一死耳  
何懼爲罵愈甚賊鬻殺之

俞錫三字家善國學生年十三父羸弱母多病值洪  
楊之亂舉家遷徙錫三首奉父母以行繼挈弟妹次  
取什物布置井井雖童稚若成人亂平處境益困錫  
三日籌生計夜自苦讀且督課兩弟俱成名先有從  
兄嫂者慘罹兵劫遺孤二遵父命收養授讀完婚視  
同己出其後家道稍裕於救災恤貧置渡修橋諸善  
舉飲助尤力好施樂善鄉論翕然  
楊堯齡咸豐時負祖避亂猝罹賊手哀釋其祖不允  
遂罵不絕口祖死齡亦殉焉  
程道高字彥登事親以孝聞有孀姊母極憐愛之時

值端午母歎曰汝姊無夫又無子瑩瑩子立其何以堪高聞之遂迓與同居終身養贍焉父病嘗糞並割股和藥以進病尋瘥

朱行昇字大猷父早喪家極貧惟力田以養孀母後母病歿殯殮無出鬻身與葉大薦已成券矣薦聞而憐之遽還其券且贈以金時論兩賢之

朱文寶字若珍少孤家貧奉孀母王氏甚謹兄弟之間怡怡如也終身未嘗析居孝友著於鄉里人無間言

劉開光字景彰父病七載牀褥支離光奉侍唯謹無

間寒暑以積勞致疾卒

戴方賢性渾噩事親至孝父患惡疾晝夜號醫藥迄無效賢吮之痛稍止如是者日必數次尋愈

李益彰性友愛一日偕弟入山行經林莽中猝遇虎恐弟被噬奮不顧身攘臂叱虎虎熟視曳尾去竟得無恙

孫鍾靈字明秀性真摯母多病朝夕侍側跬步不離弟以游蕩廢學不忍過責惟痛自撻以期感動之析爨時家貲田產絕不與弟較嘗曰兄弟手足也爲爭貲產而傷手足之誼吾何忍也後弟亦潛悟終身敦

和好焉

李邁芳祖病以父年邁代盡子職侍湯藥惟謹中衣  
廁踰親浣濯之不以為穢曾嘗糞以驗病之差劇重  
親致孝人尤以為難

朱文部字輝若少孤與兄依叔父以居事孀母高氏  
竭誠盡歡母後以病危割股救之不及拊棺擗踊痛  
不欲生見者憐之

李應瑚幼失怙恃惟繼母僅存瑚先意承志事如生  
母母亦愛如己出母歿後日至墓所瞻戀徘徊不忍  
去且哭之慟焉人感其孝有泣下者

秦宏樑字步陞父病母胡氏割股啖之父死家貧樑  
又幼母撫此數歲兒至不得已乃乞食以養焉後樑  
成立母已病歿樑痛甚於木主前每日朝夕泣涕進  
食終身孺慕供奉不衰

何道顯字微之母病顯日夜憂泣不知所為一日割  
股肉以進母嗅之有異疑而問之顯終不言病亦尋  
愈

俞紹寶天性最篤光緒二十年三月初七日夜鄰火  
燔其廬寶從睡夢中醒覺勢已熾倉卒奔出俄念雙  
親在室痛極呼號復冒火入救焚死

劉汝霖邑廩生至性過人嘗刲股以療親疾疾竟愈  
宗族鄉黨皆稱之

牧鐸字鎮卿廩貢生讀書敦孝義父年老患痰喘竟  
夕不能睡鐸屏氣侍立聞嗽聲則急捧盂以進溽暑  
沍凍習以爲常至歿時乃已

吳萬餘母張氏年老病篤諸醫束手餘籲天求代刲  
股肉作羹以進母病竟愈後四年方卒

程昌琴字撫桐事親誠敬夏扇枕席冬則以身溫被  
親歿後哀毀逾禮凡遇忌日設位而哭悽愴傷懷聞  
者爲之惻然

按刲股例不列旌典然一念之誠固亦有未可盡沒  
者此外尚有俞針開俞一齊俞永賢俞什仍俞考澤  
朱嘉效朱密祚朱柏林朱茂華朱飛昇朱之廣朱之  
紀朱柯生朱必李朱孔昭孫應選孫時高孫鳴算孫  
喬壽孫自昇孫友泗孫時麟孫師訥孫宏宋孫佑全  
孫大猷孫自會孫揚悌孫文瓚孫宏福陶天孝皆以  
刲股舉報今彙錄於後以爲人子事親者勸

以上新增